



გამარტივებული ელექტრონული ტენდერი

პირველი მაისის ადმინისტრაციული ერთეულის წყალსადენის სისტემის დაქსელებისა და სათაო ნაგებობის საპროექტო-სახარჯთაღრიცხვო დოკუმენტაციის შედგენის და პროექტის ექსპერტიზის შესყიდვაზე

სატენდერო დოკუმენტაციის პროექტი

2016

ს ა რ ჩ ე ვ ი

1. ინფორმაცია ტენდერში მონაწილეთათვის:

2. ტექნიკური დოკუმენტაცია:

3. ტექნიკური დავალება

4. სახელმწიფო შესყიდვების შესახებ ხელშეკრულების პროექტი

1. ინფორმაცია ტენდერში მონაწილეობის

სახელმწიფო შესყიდვის პროცედურა ხორციელდება სახელმწიფო შესყიდვების ერთიანი ელექტრონული სისტემის (შემდგომში –სისტემა) მეშვეობით, საქართველოს კანონის „სახელმწიფო შესყიდვების შესახებ“, „გამარტივებული შესყიდვის, გამარტივებული ელექტრონული ტენდერისა და ელექტრონული ტენდერის ჩატარების წესის

დამტკიცების შესახებ” სახელმწიფო შესყიდვების სააგენტოს თავმჯდომარის 2011 წლის 7 აპრილის №9 ბრძანების შესაბამისად.

იხილეთ: <http://procurement.gov.ge/>

1.2 სატენდერო წინადადება შედგება სატენდერო წინადადების ფასისგან და ტექნიკური დოკუმენტაციისგან.

1.3 გამარტივებულ ელექტრონულ ტენდერთან ან ელექტრონულ ტენდერთან დაკავშირებული ყველა დოკუმენტი ან/და ინფორმაცია წარმოდგენილ უნდა იქნეს ქართულ ენაზე. დოკუმენტების ან/და ინფორმაციის უცხოურ ენაზე წარდგენის შემთხვევაში მათ უნდა დაერთოს ნოტარიულად დამოწმებული ქართული თარგმანი.

1.4 დავის შემთხვევაში უცხოენოვან დოკუმენტსა და მის ქართულ ენაზე შესრულებულ თარგმანს შორის,პრიორიტეტის მინიჭების საკითხს წყვეტს სატენდერო კომისია.

1.5 სახელმწიფო შესყიდვების ერთიან ელექტრონულ სისტემაში (შემდგომში–სისტემა) ატვირთული ყველა დოკუმენტი ან/და ინფორმაცია ხელმოწერილი ან/და ბეჭედდასმული (ბეჭდის არსებობის შემთხვევაში) უნდა იყოს უფლებამოსილი პირის მიერ (საჭიროების შემთხვევაში ატვირთულ უნდა იქნას მინდობილობა ან რწმუნებულება).

1.6 ხელშეკრულების ფორმა და პირობები მოცემულია სატენდერო დოკუმენტაციაში, რომელიც ხელშეკრულების დადების მომენტისათვის დაზუსტდება სატენდერო წინადადების შესაბამისად.

1.7. სატენდერო წინადადებაში ფასი გამოსახული უნდა იყოს საქართველოს კანონმდებლობით გათვალისწინებული და შესყიდვის ობიექტის მიწოდებასთან დაკავშირებული ყველა გადასახადის გათვალისწინებით. სატენდერო წინადადების საერთო და ერთეულის ფასის წარმოდგენა დასაშვებია მხოლოდ ლარში.

1.8 პრედენდენტს არა აქვს უფლება წარმოადგინოს ალტერნატიული წინადადება.

2. ტექნიკური დოკუმენტაცია

2.4 პრეტენდენტის მიერ სისტემაში ტექნიკური დოკუმენტაციის სახით ატვირთული უნდა იყოს:

2.4.1 სატენდერო დოკუმენტაციით გათვალისწინებული დანართი N1 - სახელმწიფო შესყიდვის სატენდერო წინადადების ფასი (დღგ-ის ჩათვლით ლარი) და პრეტენდენტის მიერ წარმოსადგენი (შესავსები) ფასების ცხრილი. აღნიშნულ დანართში პრეტენდენტის მიერ მითითებულ უნდა იქნას მომსახურების ღირებულება, მომსახურების გაწევის ვადები და რეკვიზიტები.

2.4.2 შესყიდვაში მონაწილეობის მსურველ პირს უკანასკნელი 3 (სამი) და მიმდინარე წლის განმავლობაში, გაწეული უნდა ჰქონდეს საპროექტო მომსახურება არანაკლებ 200 000 ლარის ღირებულებით, მათ შორის ტენდერით გათვალისწინებული ანალოგიური ხასიათის, სირთულის და შინაარსის მომსახურების ერთი ობიექტის 30000 ლარის ღირებულების საპროექტო-სახარჯთაღრიცხვო დოკუმენტაციის შედგენა, რაც უნდა დადასტურდეს პრეტენდენტის მიერ წარმოდგენილი ხელშეკრულების და მიღება-ჩაბარების აქტის სახით. აღნიშნული ინფორმაცია წარმოდგენილ უნდა იქნეს დანართი №2 შესაბამისად.

მომსახურების გაწევის ფორმები და ვადები

მომსახურების გაწევა მოხდება:

1. ა) ხელშეკრულების გაფორმებიდან 60 კალენდარულ დღეში, ხოლო ექსპერტიზისათვის სამუშაოს დასრულებიდან 45 კალენდარული დღე. (პროექტი უნდა იყოს სსიპ „ლევან სამხარაულის სახელობის სასამართლო ექსპერტიზის ეროვნული ბიურო“-ს ან სხვა აკრედიტებული პირის მიერ დაექსპერტებული)

ანგარიშსწორების პირობები

2.6.1 სატენდერო წინადადება წარმოდგენილი უნდა იყოს დღგ-ს გათვალისწინებით.

2.6.2 ანგარიშსწორება განხორციელდება 20 კალენდარული დღის განმავლობაში, მიმწოდებლის მიერ წარდგენილი სსიპ „ლევან სამხარაულის სახელობის სასამართლო ექსპერტიზის ეროვნული ბიუროს“ ან სხვა აკრედიტებული ორგანოს საექსპერტო დასკვნის, შესაბამისი სამსახურის მიერ პროექტის დამტკიცების, შემსყიდველის მიერ სრული საპროექტო დოკუმენტაციის მოწონების შემდგომ გაფორმებული მიღება-ჩაბარების აქტის და საგადასახადო ანგარიშ-ფაქტურის წარდგენის საფუძველზე.

2.6.3. მიმწოდებლის მოთხოვნის შემთხვევაში გამოიყენება წინასწარი ანგარიშსწორება ავანსი, ხელშეკრულების საერთო ღირებულების 30% ოდენობით, რომელიც ჩაერიცხება საბანკო გარანტიის საბანკო დაწესებულებიდან წარმოდგენის შემთხვევაში, რომლის მოქმედების ვადა 2 (ორი) თვით უნდა აღემატებოდეს სამუშაოების შესრულების ვადას.

3. ნორმები და სტანდარტები

შემსრულებელმა გასაწევი მომსახურების შედგენისას უნდა იხელმძღვანელოს ქვეყანაში მოქმედი სამშენებლო ნორმებითა და სტანდარტებით.

4. ინფორმაცია ფასწარმოქმნის ადეკვატურობის შესახებ:

4.1 სახელმწიფო შესყიდვების სააგენტოს თავმჯდომარის 2011 წლის 7 აპრილის №9 ბრძანებით დამტკიცებული „გამარტივებული ელექტრონული ტენდერისა და ელექტრონული ტენდერის ჩატარების წესის“ მე-9 მუხლის 11 პუნქტის შესაბამისად, შესყიდვის თავისებურებიდან გამომდინარე (ინტელექტუალური მომსახურება) შემსყიდველი ორგანიზაცია არ ითვალისწინებს ფასწარმოქმნის ადეკვატურობის დასაბუთების ვალდებულებას

ტექნიკური დავალება და მომსახურების აღწერილობა პროექტზე

„პირველი მაისის წყალსადენი სისტემის სამშენებლო - სამონტაჟო სამუშაოები“

1. შესავალი

მოცემული დოკუმენტი მოიცავს ყველა აუცილებელ ინფორმაციას, რომელიც საჭიროა საპროექტო მომსახურების გაწევისათვის.

2. მიზანი და პირობები

წინამდებარე დავალების მიზანს წარმოადგენს დეტალური პროექტის მომზადება შემდგომში სამშენებლო-სამონტაჟო სამუშაოების განსახორციელებლად.

საპროექტო დოკუმენტაცია უნდა დამუშავდეს საქართველოს კანონმდებლობისა და კანონქვემდებარე ნორმატიული დოკუმენტების მოთხოვნების გათვალისწინებით.

2.1 პროექტის მოკლე აღწერა

პროექტი ითვალისწინებს ხობის მუნიციპალიტეტის პირველი მაისის ადმინისტრაციულ ერთეულში მოსახლეობისათვის ხარისხიანი სასმელი წყლის უწყვეტი (24 საათიანი) მიწოდების უზრუნველყოფას.

3. დეტალური საინჟინრო პროექტის მომზადება

პროექტის მომზადებისას ყურადღება უნდა მიექცეს შემდეგ ძირითად საკითხებს:

1. საპროექტო მომსახურების პირველ ეტაპზე მიმწოდებელმა უნდა უზრუნველყოს წინასწარი საპროექტო საკვლევაძიებო სამუშაოების წარმოება (ტოპოგრაფია, გეოლოგია, საჭიროების შემთხვევაში ჰიდროგეოლოგია, საპროექტო დამახასიათებელი ობიექტებისთვის (სათავე, გამწმენდი, რეზერვუარი, საქლორატორო ან სხვა პროექტში მოხვედრილი საჭირო ნაგებობები) ადგილმდებარეობის ფოტო მასალა და ტოპოგრაფიაზე მორგებული საკადასტრო ინფორმაცია (წითელი ხაზები), დააზუსტოს შესასრულებელი საპროექტო სამუშაოების ჩამონათვალი და შესათანხმებლად წარუდგინოს დამკვეთს (მათ შორის სხვა აუცილებელი სამუშაოების წარმოქმნის შემთხვევაშიც).
2. საბოლოო პროექტის წარმოდგენამდე, ასევე შესათანხმებლად უნდა იყოს წარმოდგენილი ალტერნატიული, საპროექტო წყალმომარაგების ქსელის, მინიმუმ ორი განსხვავებული ვარიანტი (კონცეფცია, შესაბამისი ტექნიკურ - ეკონომიკური მაჩვენებლებით), რომელიც სრულ შესაბამისობაში უნდა იყოს დამკვეთის მოთხოვნებთან და მხოლოდ შემდგომ დასრულდეს შეთანხმებული ვარიანტი.

3. პროექტის შემადგენლობა:

- განმარტებითი ბარათი;
- გრაფიკული ნაწილი - ნახაზები;
- ზოგადი და ტექნიკური სპეციფიკაციები;
- სამუშაოთა მოცულობების უწყისები;

- ნაკრები და ლოკალური ხარჯთაღრიცხვები;
- სამუშაოების წარმოების ორგანიზების პროექტი, კალენდარული გეგმა-გრაფიკი;
- გარემოსდაცვითი მართვის გეგმა;
- არსებული მდგომარეობის ამსახველი ფოტომასალა.
- კომუნიკაციის გადაკვეთების შეთანხმებისთვის საჭირო ყველა დოკუმენტი და შესაბამისი ნახაზები.

4. სანებართვო დოკუმენტაცია (საჭიროების შემთხვევაში - პროექტის შინაარსისა და სირთულის მიხედვით):

- ექსპერტიზის დასკვნა;
- ნაკვეთის საკუთრების (სახელმწიფო, მუნიციპალური, საქართველოს გაერთიანებული წყალმომარაგების კომპანია) დამადასტურებელი დოკუმენტი;
- მშენებლობის ნებართვა;
- ტექნიკური პირობები (მაგალითად ელექტომომარაგებაზე, გაზომომარაგებაზე და ა.შ.);
- (დამკვეთის პრეროგატივა) შეთანხმებები კომუნიკაციების გადაკვეთაზე (ამ კომუნიკაციების მფლობელების/ ოპერატორებისაგან, მაგ. საავტომობილო გზები, რკინიგზა, გაზსადენი).

5. პროექტის შინაარსი:

- პროექტის განმარტებით ბარათში აღწერილი უნდა იყოს არსებული მდგომარეობა (წინასწარი საკვლევადიებო სამუშაოები, მათ შორის ტოპოგრაფია) და საპროექტო გადაწყვეტილებები (უნდა დაერთოს საჭირო ანგარიშები, სქემები, ცხრილები, ფოტომასალა და ა.შ.) მოცემული უნდა იყოს სამონტაჟო (არსებულის გამოყენების შემთხვევაში სარეაბილიტაციო) სამუშაოთა ჩამონათვალი, მოცულობები და მშენებლობის ორგანიზაციის რეკომენდაციები, საორიენტაციო კალენდარული გრაფიკი, საჭირო მანქანა-მექანიზმები, გარემოსდაცვითი ნაწილი. მითითებული უნდა იყოს გამოყენებული სამშენებლო ნორმები, წესები და გაანგარიშების მეთოდები;
- მითითებული უნდა იყოს მომხმარებელთა რაოდენობა (მათ შორის სახანძრო ჰიდრანტები), საპროექტო სიმძლავრეები (მაგალითად წყალმოთხოვნილება, მაგისტრალური მილსადენების და ქსელების წყლის საანგარიშო ხარჯები, ასევე ჭაბურღილების და სარეზერვუარო მეურნეობის კომუნიკაციების დეტალური ანგარიში), სათანადო საიჟინრო გაანგარიშებები (სასურველია შესაბამისი კომპიუტერული პროგრამის გამოყენებით), პროექტით გათვალისწინებული ყველა ტექნოლოგიური და ელექტო მოწყობილობა-დანადგარის საპროექტო მახასიათებლები;
- ახალი ნაგებობის ან არსებულის რეკონსტრუქციის შემთხვევაში, კონსტრუქციული გადაწყვეტილებების დასაბუთება/სათანადო ანგარიშები;
- პროექტს უნდა ახლდეს სამშენებლო ტერიტორიის საინჟინრო-გეოლოგიური და ჰიდროგეოლოგიური პირობების აღწერა, ფუძის გრუნტების ფიზიკურ-მექანიკური მახასიათებლების მითითებით. გრუნტის წყლების დონეები, ფილტრაციული მახასიათებლები. მითითებული უნდა იყოს გრუნტების ჯგუფი დამუშავების სირთულის მიხედვით (ჰიდროტექნიკური ნაგებობების და წყალმომარაგების წყაროდ ზედაპირული წყლის გამოყენების შემთხვევაში პროექტს უნდა ახლდეს ჰიდროლოგიური დასაბუთება);
- სამუშაოთა ხარჯთაღრიცხვები და სატენდერო სამუშაოთა მოცულობების ცხრილები შედგენილი უნდა იყოს დონორისათვის მისაღები და დამკვეთთან შეთანხმებული ფორმით.

- ზოგადი და ტექნიკური სპეციფიკაციები ცალკე უნდა დაერთოს პროექტს და უნდა მოიცავდეს სამშენებლო ტენდერში მონაწილეთათვის/კონტრაქტორისათვის ზოგად მითითებებსა და რეკომენდაციებს. ასევე, დეტალურ სპეციფიკაციებს (ყველა აუცილებელი სტანდარტის მითითებით) გამოყენებული მასალებისა და მოწყობილობა-დანადგარებისათვის, სამუშაოთა შესრულების/გამოცდის მეთოდებისა და ხარისხის კონტროლისთვის (შენიშვნა: სრულყოფილი სპეციფიკაციების მომზადება მნიშვნელოვანია შესრულებული სამუშაოების და დამონტაჟებული მოწყობილობა-დანადგარების მაღალი ხარისხის უზრუნველსაყოფად).
- ეკონომიკური სპეციფიკაციები პროექტს უნდა დაერთოს ეკონომიკური ანალიზის ნაწილი, რომელიც უნდა მოიცავდეს პროექტის განხორციელებისთვის საჭირო კაპიტალურ ხარჯებს (CAPEX) და ასევე საოპერაციო და მოვლა შენახვის საშუალო წლიურ ხარჯებს (OPEX). აღნიშნული მონაცემები აუცილებელია მომზადდეს პროექტის ტექნოლოგიური გადაწყვეტის ყველა შესაძლო ალტერნატივისათვის (პროექტის ტექნიკური თავისებურებებიდან გამომდინარე წარმოდგენილ უნდა იყოს ტექნოლოგიური გადაწყვეტის სულ მცირე ორი ალტერნატივა). ასევე წარმოდგენილ უნდა იქნას ხარჯების გაანგარიშების თითოეული ალტერნატივის მეთოდოლოგია შესაბამისი განმარტებითა და მონაცემთა წყაროების მითითებით, რომელიც იძლევა დეტალურ ინფორმაციას პროექტის განხორციელებისთვის საჭირო ხარჯების შესახებ. ხარჯთაღრიცხვა უნდა იყოს დეტალური და შეესაბამებოდეს ხარჯთაღრიცხვის წარმოების სტანდარტებს.
- პროექტის გრაფიკული ნაწილი (სამშენებლო ნახაზები) შესრულებული უნდა იყოს სამუშაო დოკუმენტაციისათვის მოთხოვნილი ნორმების და სტანდარტების შესაბამისად, სათანადო მასშტაბებში და დეტალიზაციით. გრაფიკული ნაწილი უნდა მოიცავდეს ობიექტის სიტუაციურ და გენერალურ გეგმებს. ხაზობრივი ნაგებობების გრძივ და განივ პროფილებს, ტიპიურ კვეთებს ყველა დეტალის ჩვენებით. მაგისტრალზე და ქსელზე არსებული ტიპიური ნაგებობების ნახაზებს. შენობა-ნაგებობების დეტალურ არქიტექტურულ და კონსტრუქციულ ნახაზებს. ელქტრო და ტექნოლოგიური მოწყობილობების განთავსების და მიერთების სქემებს, ყველა ზომის, ნიშნულის და ტექნიკური მახასიათებლის მითითებით. ნახაზებზე მოცემული უნდა იყოს სამუშაოთა მოცულობების და მასალათა სპეციფიკაციების ცხრილები. (ნახაზებზე, სამუშაოთა მოცულობებში, სპეციფიკაციებში და ხარჯთაღრიცხვებში მოცემული რაოდენობრივი და ტექნიკური მაჩვენებლები უნდა შეესაბამებოდეს ერთმანეთს).

ზემოთ აღნიშნული დოკუმენტაცია წარმოდგენილი უნდა იყოს ამობეჭდილი და ელექტრონული ვერსიების სახით (4 ეგზემპლარად ამობეჭდილი, ხელმოწერილი ვერსია და ელექტრონულად რედაქტირებად ფორმატებში) ქართულ და ინგლისურ ენებზე. პროექტის ტექსტური ნაწილის ელექტრონული ვერსიები მომზადებული უნდა იყოს MS Word და Excel ფორმატში, გრაფიკული ნაწილი - AutoCAD ფორმატში. სატენდეროდ აუცილებელია, ასევე, ნახაზების წარმოდგენა PDF ფორმატში.

მიმწოდებლის მიერ დაუშვებელია ისეთი არქიტექტურული, საინჟინრო თუ სხვა გადაწყვეტების შემუშავება, რომელიც მიბმული იქნება ერთ კონკრეტულ ბრენდთან ან მომწოდებელთან, ანუ ისე უნდა მოხდეს გადაწყვეტების შემუშავება რომ შესაძლო იყოს აღნიშნული მახასიათებლების პროდუქციის მოწოდებაზე ალტერნატივების არსებობა.

მშენებლობის პროცესში საპროექტო გუნდის მიერ, საჭიროების შემთხვევაში, მოხდეს საავტორო ზედამხედველობის განხორციელება, პროექტთან დაკავშირებულ ნებისმიერ კითხვაზე პასუხის გაცემა და შემდეგი ვალდებულებების შესრულება:

- უზრუნველყოფა იმისა, რომ სამუშაოები შესრულდეს ნახაზების, სპეციფიკაციებისა და პროექტის სხვა მოთხოვნების შესაბამისად.
- დამკვეთის წინასწარი ინფორმირებულობის უზრუნველყოფა პროექტთან დაკავშირებულ ყველა საკითხთან მიმართებაში, რომლებიც საჭიროებენ დაუყოვნებლივ ჩართულობას და გადაწყვეტილების მიღებას დამკვეთის მხრიდან.
- დამკვეთის ინფორმირებულობის უზრუნველყოფა დაკავშირებული ისეთ საკითხებთან, რომელიც უკავშირდება პროექტის დაგეგმილი შესრულების ხარისხის გაუარესებას ან ცვლილებას.
- მოთხოვნის შემთხვევაში, კონტრაქტორების მიერ სამშენებლო მოედანზე გამართულ შეხვედრებზე დასწრება.
- კონტრაქტით გათვალისწინებული სხვა ვალდებულებების შესრულება.

საპროექტო გუნდის მიერ შემუშავებული არქიტექტურული, კონსტრუქციული, საინჟინრო და პროექტის გრაფიკული ნაწილი, დიზაინის სხვა ტიპის გადაწყვეტები ისე უნდა იყოს შემუშავებული, რომ გათვალისწინებული და შესაბამისობაში იყოს მოთხოვნილი ნორმების და სტანდარტების შესაბამისად, სათანადო მასშტაბში და დეტალიზაციით. მითითებული უნდა იყოს გამოყენებული სამშენებლო ნორმები და წესები, გაანგარიშების მეთოდები.

ნებისმიერი და ყველა საავტორო უფლება დოკუმენტებზე, მონაცემებზე, ნახაზებზე, ანგარიშებზე, სპეციფიკაციებზე, კალკულაციებზე, ტექნიკურ ინფორმაციაზე, წერილობით მასალებზე, დასკვნებზე, გრაფიკულ დიაგრამებზე, სპეციფიკაციებზე, შესასრულებელ სამუშაოებთან დაკავშირებით, რომელიც მომზადებულია, განვითარებულია ან წარმოებულია საპროექტო გუნდის მიერ, მათი შექმნისთანავე აძლევს უფლებას დამკვეთს გამოიყენოს ისინი და რჩება დამკვეთის საკუთრებაში, მას შემდეგ, რაც დამკვეთი მოახდენს შესასრულებელი სამუშაოს შესაბამისი ანაზღაურების სრულყოფილად დაფარვას. საპროექტო გუნდმა უნდა გააფორმოს ყველა დოკუმენტაცია და მოამზადოს შესაბამისი აქტები ზემოთხსენებული ინტელექტუალური საკუთრების უფლების დამკვეთისთვის გადასაცემად ან შესანარჩუნებლად. დამკვეთს შეუძლია ინფორმაცია გამოიყენოს ნებისმიერ ადგილას, ანაზღაურების გარეშე.

პროექტის განხორციელების ფარგლებში საპროექტო დოკუმენტაციაში ან/და შესასრულებელ სამუშაოებში შესატანი ნებისმიერი ცვლილება ექვემდებარება სავალდებულო პროცედურას.

მოთხოვნას ცვლილებაზე დამკვეთი მიმოიხილავს საპროექტო გუნდთან და აფასებს გავლენას კალენდარულ გრაფიკზე, პროექტზე, მშენებლობაზე ხარჯებზე.

ხელშეკრულების პროექტი
(ხელშეკრულების პირობების საბოლოო ვარიანტი შეიძლება დაზუსტდეს და დაიხვეწოს ტენდერში
გამარჯვებულ პრეტენდენტთან ხელშეკრულების გაფორმების პროცესში.)

ქ. ხობი _____ 20 -- წელი.
ერთის მხრივ, ხობის მუნიციპალიტეტი (შემდგომში „შემსყიდველი“), მისი უფლებამოსილი წარმომადგენლის, ----- სახით და მეორეს მხრივ ----- (შემდგომში მიმწოდებელი) „სახელმწიფო შესყიდვების შესახებ“ საქართველოს კანონის მე-3 მუხლის პირველი პუნქტის „რ“ ქვეპუნქტის საფუძველზე გამარტივებული ელექტრონული ტენდერის (SPA-----) ვდებთ წინამდებარე ხელშეკრულებას შემდეგზე

1. შესყიდვის ობიექტი

1.1. ხელშეკრულების შესყიდვის ობიექტს წარმოადგენს _____ საპროექტო-სახარჯთაღრიცხვო დოკუმენტაციის შედგენა და ექსპერტიზა.

1.2 კლასიფიკატორის კოდი- 71300000

2. ხელშეკრულების ღირებულება.

2.1 შესყიდვის ობიექტის მთლიანი სახელშეკრულებო თანხა საქართველოს კანონმდებლობით დადგენილი გადასახადების ჩათვლით (დღგ გათვალისწინებით) შეადგენს -----ლარს.

3. შესყიდვის ობიექტის ხარისხი და გარანტია

3.1 საპროექტო დოკუმენტაციის ხარისხი უნდა შეესაბამებოდეს სატენდერო დოკუმენტაციაში მითითებულ მოთხოვნებს.

3.2 თუ მიმწოდებლის მიერ შედგენილმა პროექტმა სამუშაო პროცესის მიმდინარეობისას ან სამუშაოს დასრულების შემდეგ გამოავლინა დეფექტები, მაშინ მიმწოდებელი ვალდებულია აანაზღაუროს სრულად ყველა მიყენებული ზარალი.

4. მომსახურების გაწევის ვადა

4.1.საპროექტო დოკუმენტაციის მიწოდების დასრულების ვადა განისაზღვროს ხელშეკრულების გაფორმებიდან _____ კალენდარულ დღეში 2016 წლის _____ ჩათვლით.

4.2 საპროექტო დოკუმენტაცია წარმოდგენილი უნდა იყოს, როგორც ელექტრონული, ასევე ბეჭდური სახით.

5. შესყიდვის ობიექტის მიღება-ჩაბარების წესი

5.1 შემსყიდველის მიერ შესყიდვის ობიექტის მიღება წარმოებს მიღება-ჩაბარების აქტით.

5.2 ობიექტის მიღების ან/და საბოლოო შემოწმების შედეგად გამოვლენილი დეფექტის ან ნაკლის აღმოფხვრას საკუთარი ხარჯებით უზრუნველყოფს მიმწოდებელი.

5.3 შესყიდვის წუნდების მიზეზის შესახებ შემსყიდველი დაუყოვნებლივ ატყობინებს მიმწოდებელს წერილობით.

6. ანგარიშსწორების ფორმა და წესი

6.1 ანგარიშსწორება მიმწოდებელთან განხორციელდება უნაღდო ანგარიშსწორებით.

6.2 ანგარიშსწორებას „შემსყიდველი“ განახორციელებს, ფაქტიურად გაწეული მომსახურების მიხედვით, „ მიმწოდებლის“ წერილობითი მომართვის, საგადასახადო ანგარიშ-ფაქტურის (ელექტრონული ვერსია) ,

ან/და კანონმდებლობით გათვალისწინებული სხვა დოკუმენტის და გაწეული მომსახურების შესახებ მიღება-ჩაბარების აქტის წარმოდგენიდან 20(ოცი) დღის განმავლობაში

7. მხარეთა უფლება-მოვალეობანი

7.1 შემსყიდველი ვალდებულია:

7.1.1 უზრუნველყოს მისთვის გადაცემული შესყიდვის ობიექტის შესაბამისი ანაზღაურების გადახდა მიმწოდებლისათვის წინამდებარე ხელშეკრულების პირობათა სრული დაცვით;

7.1.2 უზრუნველყოს მიწოდებული შესყიდვის ობიექტის შესახებ მხარეთა შორის დადგენილი ფორმის მიღება-ჩაბარების აქტის გაფორმება შესყიდვის ობიექტის მიწოდებიდან არაუადრეს 3 (სამი) სამუშაო დღისა.

7.2 შემსყიდველი უფლებამოსილია:

7.2.1 მიმწოდებლისგან მოითხოვოს შესყიდვის ობიექტის ხელშეკრულებით დადგენილი ოდენობითა და ვადაში მიღება;

7.2.2 მიმწოდებლის მიერ ხელშეკრულებით გათვალისწინებულ პირობათა შეუსრულებლობის შემთხვევაში შეწყვიტოს ხელშეკრულება;

7.2.3 მიმწოდებლისგან მოითხოვოს შესყიდვის ობიექტის გადაცემის შესახებ დადგენილი ფორმის მიღება-ჩაბარების აქტის გაფორმება.

7.3 მიმწოდებელი ვალდებულია:

7.3.1 ხელშეკრულებით დადგენილ ვადაში სამშენებლო ნორმებისა და წესების დაცვით შეადგინოს საპროექტო-სახარჯთაღრიცხვო დოკუმენტაცია და გადასცეს შემსყიდველს.

7.3.2 დროულად აცნობოს შემსყიდველს მის მიერ წარმოდგენილი საპროექტო დოკუმენტაციის ხარვეზის ან ნაკლის შესახებ, რათა უკანასკნელს მიეცეს შესაძლებლობა უმოკლეს ვადაში აღმოფხვრას იგი.

7.3.3 ხელშეკრულების მოქმედების პერიოდში შემსყიდველს წარუდგინოს შესყიდვის ობიექტთან დაკავშირებით ნებისმიერი სახის ინფორმაცია და დოკუმენტები;

7.3.4 დაუყოვნებლივ აცნობოს შემსყიდველს ხელშეკრულებით გათვალისწინებული ვალდებულებების შესრულების შეუძლებლობისა ან/და ხელისშემშლელ დაბრკოლებათა შესახებ;

7.3.5 საკუთარი ხარჯებით უზრუნველყოს შემსყიდველის მიერ გამოვლენილი შესყიდვის ობიექტის მდგომარეობასთან დაკავშირებული ყველა ნაკლის აღმოფხვრა;

7.3.6 ხელშეკრულების შესრულების პერიოდში სუბკონტრაქტების დადების აუცილებლობის წარმოშობის შემთხვევაში, წერილობით აცნობოს შემსყიდველს შესაბამისი თანხმობის მისაღებად.

7.4 მიმწოდებელი უფლებამოსილია:

7.4.1 შემსყიდველისგან მოითხოვოს ამ ხელშეკრულებით გათვალისწინებული ვალდებულებების სრულად და დროულად შესრულება.

7.5. მიმწოდებელი პასუხისმგებელია:

7.5.1 მიმწოდებელი პასუხისმგებელია სრულყოფილი საპროექტო დოკუმენტაციის ხარისხიანად დამუსავებაზე და სამშენებლო სამუშაოების სახარჯთაღრიცხვო დოკუმენტაციის შედგენაზე.

7.5.2 იმ შემთხვევაში, თუ მიმწოდებლის დაშვებული ხარვეზების გამო მშენებლობის პროცესში აღმოჩნდება სახარჯთაღრიცხვო ღირებულების 10%-ზე მეტი გაუთვალისწინებელი დამატებითი სამუშაოების შესრულების აუცილებლობა, ამ ანაზღაურებას მიმწოდებელი იღებს თავის თავზე.

8. უფლებების გადაცემა

8.1 მიმწოდებელს არა აქვს უფლება შემსყიდველის წერილობითი თანხმობის გარეშე მთლიანად ან ნაწილობრივ გადასცეს მესამე პირს ხელშეკრულებით გათვალისწინებული უფლება-მოვალეობანი.

9. ფასები

9.1 წინამდებარე ხელშეკრულების პირობების, მათ შორის ფასის შეცვლა დაუშვებელია, თუ ამ ცვლილებების შედეგად იზრდება ხელშეკრულების საერთო ღირებულება ან უარესდება ხელშეკრულების პირობები შემსყიდველისათვის, გარდა საქართველოს სამოქალაქო კოდექსის 398-ე მუხლით გათვალისწინებული შემთხვევებისა. ხელშეკრულების პირობების გადასინჯვა ხდება საქართველოს კანონმდებლობით დადგენილი წესით.

10. ხელშეკრულებაში ცვლილებების შეტანა

10.1 ხელშეკრულების დამდებ არც ერთი მხარეს არა აქვს უფლება ცალმხრივად შეცვალოს ხელშეკრულების პირობები.

10.2 თუ რაიმე წინასწარ გაუთვალისწინებელი მიზეზების გამო წარმოიშობა ხელშეკრულების პირობების შეცვლის აუცილებლობა, ცვლილებების შეტანის ინიციატორი ვალდებულია წერილობით შეატყობინოს მეორე მხარეს შესაბამისი ინფორმაცია. ამავე დროს შემსყიდველი არ არის ვალდებული წარუდგინოს მიმწოდებელს რაიმე მტკიცებულებანი იმ გარემოებებთან დაკავშირებით, რომლების გამოც წარმოიშვა ხელშეკრულების პირობების შეცვლის აუცილებლობა.

10.3 ხელშეკრულების პირობების ნებისმიერი ცვლილება უნდა გაფორმდეს ხელშეკრულების დანართის სახით, რომელიც ჩაითვლება ხელშეკრულების განუყოფელ ნაწილად.

11. შეტყობინება

11.1 ნებისმიერი შეტყობინება, მხარის მიერ ხელშეკრულების შესაბამისად, გაეგზავნება მეორე მხარეს წერილობითი სახით, ხელშეკრულებაში მითითებულ მეორე მხარის მისამართზე.

11.2 შეტყობინება შედის ძალაში ადრესატის მიერ მისი მიღების დღეს ან შეტყობინების ძალაში შესვლის დადგენილ დღეს, იმის მიხედვით, თუ ამ თარიღებიდან რომელი უფრო გვიან დგება.

12. ხელშეკრულების შესრულების შეფერხება

12.1 ხელშეკრულების შესრულების პროცესში მხარეთა წინაშე წარმოშობილი დაბრკოლების გამო ნაკისრი ვალდებულებების ვერ ან არაჯეროვნად შეუსრულებლობის საფრთხის შესახებ, მხარე ვალდებულია წერილობით აცნობოს მეორე მხარეს შეფერხების ფაქტის, მისი შესაძლო ხანგძლივობის და გამომწვევი მიზეზების შესახებ. ხოლო შეტყობინების მიმღები მხარე კი ასევე დაუყოვნებლივ აცნობებს თავის გადაწყვეტილებას აღნიშნულ გარემოებებთან დაკავშირებით.

12.2 იმ შემთხვევაში თუკი ხელშეკრულების პირობების შეფერხების გამო მხარეები შეთანხმდებიან ხელშეკრულების მოქმედების ვადის გაგრძელებაზე, ეს გადაწყვეტილება უნდა გაფორმდეს ხელშეკრულებაში ცვლილებების შეტანის გზით.

13. ხელშეკრულების პირობების შეუსრულებლობა

13.1 ფორსმაჟორული პირობების გარდა, მიმწოდებლის მიერ ხელშეკრულების პირობების შეუსრულებლობის ან/და დაგვიანებით შესრულების შემთხვევაში გამოიყენება საჯარიმო სანქციები.

13.2 ხელშეკრულებით ნაკისრი ვალდებულებების შეუსრულებლობის ან შესრულების ვადის გადაცილებისათვის მიმწოდებელს დაეკირება პირგასამტეხლოს გადახდა, - ყოველ ვადაგადაციებულ დღეზე ხელშეკრულების ღირებულების 0.3%-ის ოდენობით.

13.3 საჯარიმო თანხის გადახდა უნდა მოხდეს ვალდებულების შეუსრულებლობის მომენტიდან ერთი თვის ვადაში.

13.4 საჯარიმო თანხის გადახდა არ ათავისუფლებს მიმწოდებელს ნაკისრი ვალდებულებების შესრულებისაგან.

13.5 იმ შემთხვევაში, თუ მიმწოდებელზე ხელშეკრულების პირობების დადგენის გამო დაკისრებული პირგასამტეხლოს ჯამური თანხა გადააჭარბებს ხელშეკრულების საერთო ღირებულების 5 (ხუთი) პროცენტს, მეორე მხარეს უფლება აქვს ცალმხრივად შეწყვიტოს ხელშეკრულება.

14. ხელშეკრულების მოქმედების შეწყვეტა

14.1 ხელიშეკრული მხარის მიერ ნაკისრ ვალდებულებათა შეუსრულებლობის გამო მეორე მხარე, უფლებამოსილია ცალმხრივად შეწყვიტოს ხელშეკრულების სრული ან ცალკეული პირობების მოქმედება.

14.2 ხელშეკრულების შეწყვეტის შესახებ მხარეს ეცნობება წერილობით ხელშეკრულების (ან მისი ნაწილის) შეწყვეტამდე 3 (სამი) დღით ადრე მაინც, ამასთან, უნდა მიეთითოს მიღებული გადაწყვეტილების საფუძველი და მისი ამოქმედების თარიღი.

14.3 ხელშეკრულების ცალკეული პირობების მოქმედების შეწყვეტა, არ ათავისუფლებს მხარეებს დანარჩენი ვალდებულებების შესრულებისაგან.

14.4 მხარეთა შორის გაფორმებული საბოლოო მიღება-ჩაბარების აქტი წარმოადგენს ხელშეკრულების მოქმედების შეწყვეტის საფუძველს.

15. ფორს-მაჟორი

15.1 ხელშეკრულების დამდები რომელიმე მხარის მიერ ხელშეკრულების პირობების შეუსრულებლობა არ გამოიწვევს საჯარიმო სანქციების გამოყენებას და ხელშეკრულების გარანტიის დაუბრუნებლობას, თუ ხელშეკრულების შესრულების შეფერხება ან მისი ვალდებულების შეუსრულებლობა არის ფორსმაჟორული გარემოების შედეგი.

15.2 ამ მუხლისათვის მიზნებისათვის „ფოსმაჟორი“ ნიშნავს მხარეებისათვის გადაულახავ და მათი კონტროლისაგან დამოუკიდებელ გარემოებებს, რომლებიც არ არიან დაკავშირებული შემსყიდველისა და/ან მიმწოდებლის შეცდომებსა და დაუდევრობასთან და რომლებსაც გააჩნია წინასწარ გაუთვალისწინებელი ხასიათი. ასეთი გარემოება შეიძლება გამოწვეული იქნეს ომით ან სტიქიური მოვლენებით, ეპიდემიით, კარანტინით და საქონლის მიწოდებაზე ემბარგოს დაწესებით, საბიუჯეტო ასიგნების მკვეთრი შემცირებით და სხვა.

15.3 ფოს-მაჟორული გარემოების დადგომის შემთხვევაში ხელშეკრულების დამდებმა მხარემ, რომლისთვისაც შეუძლებელი ხდება ნაკისრი ვალდებულების შესრულება, დაუყონებლივ უნდა გაუგზავნოს მეორე მხარეს წერილობითი შეტყობინება ასეთი გარემოების და მათი გამომწვევი მიზეზის შესახებ. თუ შეტყობინების გამგზავნი მხარე არ მიიღებს მეორე მხარისგან წერილობით პასუხს იგი თავისი შეხედულებისამებრ, მიზანშეწონილობისა და შესაძლებლობის და მიხედვით აგრძელებს ხელშეკრულებით ნაკისრი ვალდებულებების შესრულებას და ცდილობს გამონახოს ვალდებულებების შესრულების ისეთი ალტერნატიული ხერხები, რომლებიც დამოუკიდებელნი იქნებიან ფოს-მაჟორული გარემოებების ზეგავლენისაგან.

16. დავების გადაწყვეტის წესი

16.1 ხელშეკრულების შესრულებისას მხარეთა შორის წამოჭრილი დავები ან აზრთა სხვადასხვაობა შესაძლებელია გადაწყვეტილ იქნას ორივე მხარის ერთობლივი მოლაპარაკების საფუძველზე.

16.2 შეთანხმების მიუღწევლობის შემთხვევაში მხარეები მიმართავენ სასამართლოს საქართველოს კანონმდებლობის შესაბამისად.

17. ხელშეკრულების კონტროლი

17.1 შემსყიდველს ან მის წარმომადგენლებს უფლება აქვთ ხელშეკრულების ნებისმიერ ეტაპზე განახორციელოს კონტროლი მიმწოდებლის მიერ ნაკისრი ვალდებულებების შესრულებაზე.

17.2 ხელშეკრულების კონტროლს ახორციელებს :

შემსყიდველი ორგანიზაციის მხრიდან - ხობის მუნიციპალიტეტის გამგეობის კონტროლის ჯგუფი.

მიმწოდებელი ორგანიზაციის მხრიდან _____

17.3 კონტროლი განხორციელდება პერიოდულად, წარმოქმნილი საჭიროებიდან გამომდინარე.

17.4 შემსყიდველი უფლებამოსილია განახორციელოს ხელშეკრულებით ნაკისრ ვალდებულებათა შესრულების, აგრეთვე მიღებული შესყიდვის ობიექტის ხარისხის რაოდენობის, შენახვის და მიწოდების ვადების კონტროლი.

17.5 მიმწოდებელი ვალდებულია შესყიდვის ობიექტის მიწოდების განხორციელების დროს შემსყიდველს შემოწმების პროცესში აღმოუჩინოს ხელშეწყობა, არ შეუქმნას ხელიშემშლელი პირობები და წარუდგინოს შესყიდვის ობიექტის მიწოდებასთან დაკავშირებით ნებისმიერი სახის ინფორმაცია და დოკუმენტები.

18. ხელშეკრულების მოქმედების ვადა

18.1 ხელშეკრულება ძალაში შედის მისი ხელმოწერის მომენტიდან და მოქმედებს 2016 წლის ----- ჩათვლით.

18.2 ხელშეკრულება შეწყვეტილად ჩაითვლება მხარეთა მიერ ნაკისრი ვალდებულებების სრულად შესრულებისთანავე.

19 . დასკვნითი დებულებანი

19.1 ხელშეკრულების მხარეები ვალდებულნი არიან გაუფრთხილდნენ თითოეულის სახელს, საქმიან რეპუტაციას და ღირსებას.

19.2 მხარეები ვალდებულნი არიან დაიცვან ერთობლივი საქმიანობის შედეგად მათთვის ცნობილი მეორე მხარის კონფიდენციალური ინფორმაცია.

19.3 ხელშეკრულების მხარეებს არა აქვთ უფლება გააკეთონ განცხადება, მეორე მხარის მიერ ხელშეკრულების ვერ ან არ შესრულების, მისი შესრულებისას დარღვევების შესახებ და ა.შ. თუ წინასწარ არ მოხდება შესაბამისი საკითხის ერთობლივი შესწავლა და შესაბამისი ფაქტების დადასტურება.

19.4 ხელშეკრულების დებულებებში ცვლილებების ან დამატებების შეტანა შესაძლებელია მხოლოდ მხარეთა შორის შეთანხმების წერილობითი გაფორმების შედეგად.

19.5 წინამდებარე ხელშეკრულება შედგენილია 4 (ოთხი) თანაბარუფლებიანი ძალის მქონე ეგზემპლარად, 3 (სამი) ეგზემპლარი ინახება შემსყიდველთან, ხოლო 1 (ერთი) ეგზემპლარი გადაეცემა მიმწოდებელს.

20. მხარეთა რეკვიზიტები და ხელმოწერები.

„შემსყიდველი“

„მიმწოდებელი“

ხობის მუნიციპალიტეტის თვითმმართველი
ერთეული

დამატებითი ინფორმაცია

სატენდერო დოკუმენტაციასთან დაკავშირებული განმარტებების მიღება პრეტენდენტს შეუძლია სატენდერო კომისიის აპარატში, წერილობითი მიმართვის შემთხვევაში ქ. ხობი, ხობის მუნიციპალიტეტის გამგეობა, ც. დადიანის №189
საკონტაქტო პირი: ბაქარ შონია (599856082)

სატენდერო წინადადების ფასი (ლარი), ფასების ცხრილი,
მიწოდების ვადა და ადგილი, რეკვიზიტები

„_____“ _____ 2016წ.

----- სატენდერო წინადადების ფასი -----
(პრეტენდენტის დასახელება)

N	მომსახურების დასახელება	განზომილება	საერთო ფასი	მიწოდების ვადა (კალ.დღე)
1	პირველი მაისის ადმინისტრაციული ერთეულის წყალსადენის სისტემის დაქსელვისა და სათაო ნაგებობის საპროექტო-სახარჯთაღრიცხვო დოკუმენტაციის შედგენა და პროექტის ექსპერტიზა	სრული პროექტი		

რეკვიზიტები:

პრეტენდენტის იურიდიული ფორმა და დასახელება:

ხელმძღვანელის თანამდებობა, სახელი და გვარი:

პრეტენდენტის იურიდიული ან/და ფაქტიური

მისამართი: საიდენტიფიკაციო კოდი:

პრეტენდენტის ტელეფონის ნომერი:

ელექტრონული მისამართი:

ბანკი:

ბანკის კოდი:

ანგარიშის ნომერი:

_____ პრეტენდენტის ხელმოწერა

მონაცემები პრეტენდენტის მიერ განხორციელებული ანალოგიური
მომსახურების შესრულების შესახებ

№	მომსახურების დასახელება	შემსყიდველის დასახელება	ხელშეკრულების ღირებულება	ხელ.გაფორმების თარიღი და SPA №-----
1				
2				

შენიშვნა:

შესყიდვაში მონაწილეობის მსურველ პირს უკანასკნელი 3 (სამი) და მიმდინარე წლის განმავლობაში, გაწეული უნდა ჰქონდეს საპროექტო მომსახურება არანაკლებ 200 000 ლარის ღირებულებით, მათ შორის ტენდერით გათვალისწინებული ანალოგიური ხასიათის, სირთულის და შინაარსის მომსახურების ერთი ობიექტის 30 000 ლარის ღირებულების საპროექტო-სახარჯთაღრიცხვო დოკუმენტაციის შედგენა, რაც უნდა დადასტურდეს პრეტენდენტის მიერ წარმოდგენილი ხელშეკრულების და მიღება-ჩაბარების აქტის სახით.